



漚水

恁久來，逐暗晡个落水聲，總係像躁光个細人仔，在佢半睡半醒个夢中，噉噉嘶嘶、穿上穿下，無一暗有好恬靜恬靜睡目。想起頭擺人聽著兩打芭蕉个聲音，心肝肚就愁愁慮慮，佢這下還聽著水打在水篷頂，叮叮咚咚、淅淅錫錫个聲音，吵到人日夜煩躁、食睡毋安，比較起來，佢還係較欽羨古人。

夜夜落水就算咧，逐日天一光擘開目珠，看著个係烏暗烏暗个天空，聽著个本本係博人惱个水聲，心情跔等就愠悴起來，在這又溼又冷个天氣出門上班、上學，一路塞車，為著赴時間，大家就少忒耐心，「叭！叭！叭！」个喇叭聲響無停，弄上弄下个奧多拜，危危險險，一下無細義，還會分路過个車仔洩到一身泥水。天氣毋好，心情毋好，大家完全失忒好天時个平靜摻忍讓。

水漚無停，佢最心痛个係原本屋前、屋後開到鬧鬧、靚靚个玫瑰、海棠、櫻花，分水涿到撥撥跌，實在打爽。毋過，最難為个還係婦人家，因為漚水，衫晾到無位好晾，一屋溼溼落溼，拚掃也毋方便，細人仔日日關到屋下，拐就拐毋核，實在辛苦。老人家本來在冷天時做得出去晒晒日頭、打打嘴鼓，這下因為漚水，斯做得坐在屋下啄目睡，乜當毋慣。最得人畏个還係菜錢，青菜因為漚水綿忒，動啊著就漲幾下倍，水果乜係貴參參仔，買毋落手。生理人也怨怪，冷颼颼个落水天，打狗就毋出門，生理難做啊！逐儕斯想：「這水到底愛漚著幾時，好停哩！」

有一日，本本係落水天，佢擎等遮仔、跑等頸筋出門，看一眼滿地个落花，心情就像這天氣恁毋好。無想著火車經過莊下時，一片青溜溜个田，錫著佢个眼光，蒔落去無幾久个秧仔，隻隻精神百倍，臥等頭享受雨水个滋潤，一陣風吹來，個個在水中歡喜跳等芭蕾。看著這光景，佢正分醒，天下事總有兩面，有利就有弊、有得就有失、有圓就有缺，毋好總用自家个立場來看萬事萬物。

「漚水漚到人就會生菇囉！」儕儕堵著就恁樣喊。毋過，佢這下學會轉換佢个心情，利用漚水清閒个時節，恬下心來，放慢腳步，用音樂、書本摻咖啡、清茶來配合雨水个節奏，也學會打開心胸，接受落花變做春泥護花个多情、還學會欣賞落水天種種个詩情畫意。

作者：張美容

☆詞彙學習☆

- | | |
|---|--|
| 【躁光】cau ^ˇ gong [`] ：活潑好動。 | 【開到鬧鬧】koi [`] do ^ˇ nau+ nau+：開得很繽紛的樣子。 |
| 【噉噉嘶嘶】ve ve se [`] se [`] ：大聲嘶喊。 | 【撥撥跌】bad [`] bad [`] died：紛紛掉落。 |
| 【水篷】shui ^ˊ pung：遮雨的棚子。 | 【拐毋核】guai ^ˊ m hed [`] ：拐騙不住。 |
| 【弄上弄下】nung ^ˇ shong [`] nung ^ˇ ha [`] ：鑽上鑽下。 | 【貴參參仔】gui ^ˇ sem [`] sem [`] er：昂貴的樣子。 |
| | 【分醒】fun [`] siang ^ˊ ：清醒。 |

☆文法學習☆

【動啊著】tung[`] a+ do^ˊ：動不動。「動啊著」字面義為「一動到、一碰到」，「啊」表動作短暫的意思。引申為「動不動」，指人容易且慣性的作出某個動作或反應。

例 1：恁大人咧，毋好動啊著就噉。(這麼大了，不要動不動就哭。)

例 2：做得好好商量，毋好動啊著就關。(可以好好商量，不要動不動就生氣。)